

# Obligaziuns e privels da la digitalisaziun

Pled d'avertura da la sessiun da primavaira

■ **(anr/fa) Il chantun duai sustegnair las vischnancas en lur stentas per metter en pe las colliaziuns cun il mund digital. En ses pled d'avertura ha Martin Aebli era menziunà las sfidas ed ils privels da quest mund.** Actualmain vegni discurrì daper tut da la «digitalisaziun». Era *Martin Aebli*, il president dal cussegl grond, ha detgà glindesdi ses pled d'avertura a questa tematica: «Grazia als indriz tecnics ed als programs per la digitalisaziun favuraivels e las colliaziuns adina pli spessas sur l'internet naschan fitg spert novas pussaivladads, ma era privels per las utilisadras ed ils utilisaders», ha el declarà. L'avertura cun la tecnologia da bindel lad è a ses avis ina part da l'infrastructura che correspundia, «sco

la chanalisaziun u il provediment d'aua», ad in basegn fundamental da la societad. «Perquai èn il chantun e las vischnancas tenor mai obligads da sustegnair fermamain las vischnancas en lur stentas da metter en pe questa infrastruttura», ha accentuà Aebli. El ha menziunà las novas professiuns e las midadas en professiuns tradiziunalas per consequenza a la digitalisaziun: «En bleras professiuns èn enconuschientschas da l'informatica ozendi indispensablas, perquai èn la scolaziun e la furmaziun supplementara da las persunas pertutgadas fitg impurtantas.» A ses avis pudess qua il chantun contribuir sia part «concepir tals programs en moda anc pli focussada e sistemica per las novas sfidas digitalas.

Sco privels da la digitalisaziun ha il president dal parlament grischun numnà tant la disponibilitad totala sco era la cuntanschibilitad permanenta: «Quai metta sut squitsch blers umans», ha avertì Aebli. En la medema direcziun van tenor el era las novas pussaivladads da pudair lavurar grazia a las novas tecnologias digitalas daper tut: «Ins è alura er adina occupà cun la professiun, ins lavura tendenzialmain dapli che damain ed il temp per sazez e per la famiglia ristga da daventar stgars.» Aebli ha menziunà er il privel da l'abus da las datas persunalas en la rait e cusseglia dad esser precaut cun quellas, las segirond regularmain e controllond er adina puspè mintgin sia «firewall».



**En ses pled d'avertura ha Martin Aebli fatg attent sin las sfidas ed ils privels da la digitalisaziun per ils utilisaders.**